

Na osnovu člana 9. Zakona o federalnim ministarstvima i drugim tijelima federalne uprave ("Službene novine Federacije BiH", br. 19/03, 38/05, 2/06 i 8/06), te odredaba Uredbe o interventnim mjerama za podršku ugroženim sektorima privrede Federacije Bosne i Hercegovine u okolnostima pandemije COVID -19, („Službene novine Federacije BiH”, broj 74/20), Federalno ministarstvo energije, rudarstva i industrije  
o b j a v l j u j e

## **JAVNI POZIV ZA PODNOŠENJE PRIJAVA ZA DODJELU FINANSIJSKE POMOĆI IZVOZNI PRIVREDNIM DRUŠTVIMA U SEKTORU INDUSTRIJE**

### **I. PREDMET JAVNOG POZIVA**

Predmet ovog Javnog poziva je prikupljanje prijava za dodjelu finansijske pomoći, u skladu sa Uredbom o interventnim mjerama za podršku ugroženim sektorima privrede Federacije Bosne i Hercegovine u okolnostima pandemije COVID -19 (u daljem tekstu: Uredba).

### **II. PRAVO UČEŠĆA**

Pravo učešća po ovom Javnom pozivu imaju privredna društva, izvoznici sa većinskim učešćem privatnog kapitala, sa sjedištem u Federaciji Bosne i Hercegovine, koja su osnovana po Zakonu o privrednim društvima („Službene novine Federacije BiH”, broj 81/15), čija je primarna djelatnost proizvodnja u sljedećim granama industrije:

- a) Metalna, elektro i automobilska industrija;
- b) Industrija građevinskog materijala i nemetala;
- c) Drvena, papirna i grafička industrija;
- d) Proizvodnja tekstila, odjeće, kože i obuće;
- e) Hemijska i farmaceutska industrija i industrija gume i plastike.

Izvoznik je privredno društvo koje je ostvarilo izvoz preko 30% od ukupnog prihoda u 2019. godini u skladu sa godišnjim finansijskim izvještajima društva.

Korisnik finansijske pomoći ne može biti privredno društvo sa većinskim državnim kapitalom, kao i javno preduzeće na bilo kojem nivou u Federaciji Bosne i Hercegovine. Neprihvatljivim korisnicima finansijske pomoći smatraju se i:

- a) korisnici koji su u stečaju ili nad kojima je pokrenut postupak stečaja ili likvidacije;
- b) korisnici kojima je upućen zahtjev odnosno nalog za povrat dodijeljenih budžetskih sredstava iz prethodnog perioda a koji do dana podnošenja zahtjeva nije realiziran;
- c) korisnici koji su nakon 01.08.2020. godine isplatili dividendu/dobit iz prethodnih godina, osim ako je dividenda isplaćena u obliku dionica korisnika pomoći;
- d) korisnici koji imaju dospjele, a neizmirene obaveze po osnovu doprinosa, direktnih i indirektnih poreza, zaključno sa 30.06.2020. godine, a za koje nisu zaključeni sporazumi o obročnom plaćanju duga i/ili koji uredno ne izmiruju dospjele obaveze po zaključenom sporazumu;
- e) korisnici čiji su glavni računi na koje im se finansijska pomoć isplaćuje na dan podnošenja zahtjeva blokirani radi provođenja izvršenja na novčanim sredstvima.

### **III. SVRHA DODJELE SREDSTAVA**

Cilj dodjele finansijske pomoći po ovom Javnom pozivu je očuvanje radnih mjesta i osiguranje podrške za očuvanje i poboljšanje likvidnosti privrednih društava u izvozno orijentisanim granama industrije, za prevladavanje vanrednih okolnosti koje je izazvala pandemija COVID-19.

Finansijska pomoć predstavlja dodjelu bespovratnih finansijskih sredstava ugroženim granama industrije u Federaciji Bosne i Hercegovine u okolnostima izazvanim pandemijom COVID – 19, koja se uplaćuju na račun korisnika finansijske pomoći u skladu sa kriterijima iz ovog Javnog poziva.

Finansijska pomoć se može koristiti isključivo za isplate minimalnih bruto plaća za period od 01.07.2020. godine do 31.12.2020. godine i troškove poslovanja koji su nastali u periodu od 01.07.2020. godine do 31.12.2020. godine. Pod troškovima poslovanja podrazumijevaju se troškovi zakupa, električne energije, toplotne energije, plina, vode, telefona, interneta i troškovi komunalnih usluga.

Korisnici finansijske pomoći ne mogu smanjiti broj radnika u periodu do 31.12.2020. godine, u odnosu na broj radnika na dan 30.09.2020. godine.

### **IV. KRITERIJI ZA IZBOR KORISNIKA**

Pravo na učešće po ovom Javnom pozivu i dodjelu finansijske pomoći ima privredno društvo koje ispunjava sljedeće kriterije:

- 1) da je sa sjedištem u Federaciji Bosne i Hercegovine;
- 2) da je izvoznik sa većinskim učešćem privatnog kapitala;
- 3) da mu je primarna djelatnost proizvodnja u granama industrije kako slijedi:
  - Metalna, elektro i automobilska industrija;
  - Industrija građevinskog materijala i nemetala;
  - Drvena, papirna i grafička industrija;
  - Proizvodnja tekstila, odjeće, kože i obuće;
  - Hemijska i farmaceutska industrija i industrija gume i plastike.

Visina iznosa koji se dodjeljuje za finansijsku pomoć, izračunava se u odnosu na:

- a) Vrijednost izvoza u periodu od 01.01.2019. godine do 31.12.2019. godine: Izračuna se ukupna vrijednost izvoza formalno ispravnih zahtjeva za svaku granu industrije. Na osnovu dobijenog iznosa, računa se procentualno učešće svakog formalno ispravnog zahtjeva, za tu granu industrije. Na osnovu dobijenog procentualnog učešća, izračuna se iznos sredstava za dodjelu za kvalifikovanog korisnika i to u odnosu na 60% iznosa ukupno raspoloživih finansijskih sredstava po grani industrije.
- b) Broj radnika na dan 30.09.2020. godine: Izračuna se ukupan broj radnika svih formalno ispravnih zahtjeva po granama industrije i na osnovu toga se računa procentualno učešće svakog formalno ispravnog zahtjeva u odnosu na granu industrije kojoj pripada. Na osnovu dobijenog procentualnog učešća, izračuna se iznos sredstava za dodjelu za kvalifikovanog korisnika i to u odnosu na 40% iznosa ukupno raspoloživih finansijskih sredstava po grani industrije.

Maksimalan iznos finansijske pomoći koji se može dodijeliti jednom korisniku, po ovom pozivu, ne može preći iznos od 700.000 KM.

## **V. SREDSTVA PREDVIĐENA ZA DODJELU**

Ukupna raspoloživa finansijska sredstva, za provođenje ovog Javnog poziva, iznose 30.000.000 KM.

Navedena sredstva su grant sredstva Federalnog ministarstva energije, rudarstva i industrije (u daljem tekstu: Ministarstvo) i dodjeljuju se po ovom Javnom pozivu.

Raspoloživi iznos sredstava za dodjelu finansijske pomoći po granama industrije u odnosu na procentualno učešće izvoza svake grane u ukupnom izvozu Federacije Bosne i Hercegovine na dan 31.12.2019. godine, po granama je:

- a) Metalna, elektro i automobilska industrija – 15.078.350 KM;
- b) Industrija građevinskog materijala i nemetala – 690.000 KM;
- c) Drvena, papirna i grafička industrija – 5.016.260 KM;
- d) Proizvodnja tekstila, odjeće, kože i obuće – 4.026.840 KM;
- e) Hemijska i farmaceutska industrija i industrija gume i plastike – 5.188.550 KM.

## **VI. TRAJANJE JAVNOG POZIVA**

Javni poziv ostaje otvoren 21 dan od dana objave Obavijesti o objavi Javnog poziva u dnevnim novinama „Dnevni avaz“ i „Večernji list“, odnosno do 10.11.2020. godine.

Nepotpune i neblagovremene prijave neće biti uzete u razmatranje i proglašiće se formalno neispravnim prijavama.

## **VII. PROVOĐENJE JAVNOG POZIVA**

Dokumentacija koju je potrebno priložiti u skladu sa ovim Javnim pozivom, treba biti original ili ovjerena kopija, i ne može biti starija od 30 dana, i to:

1. Zahtjev za dodjelu finansijske pomoći sa obaveznom naznakom za koju granu industrije podnosi zahtjev (na memorandumu društva, kontakt telefon i službena e-mail adresa sa popisom dokumentacije koja se dostavlja po Javnom pozivu),
2. Aktuelni izvod iz sudskog registra,
3. Uvjerenje o poreznoj registraciji kod Porezne uprave – ID broj,
4. Uvjerenje o registraciji obveznika poreza na dodatnu vrijednost – PDV broj,
5. Obavještenje nadležnog zavoda za statistiku o razvrstavanju prema djelatnosti,
6. Uvjerenje nadležne organizacione jedinice Porezne uprave da nema neizmirenih obaveza po osnovu javnih prihoda zaključno sa 30.06.2020. godine, ili ukoliko ih ima, da je sklopljen sporazum o obročnom plaćanju duga i da se uredno izmiruju dospelje obaveze,
7. Uvjerenje/potvrdu nadležne organizacione jedinice UIO da nema neizmirenih obaveza po osnovu indirektnih poreza zaključno sa 30.06.2020. godine ili ukoliko ih ima, da je sklopljen sporazum o obročnom plaćanju duga i da se uredno izmiruju dospelje obaveze,
8. Zvanični finansijski izvještaji za 2019 godinu;
9. Izjavu, ovjerenu pečatom firme i potpisom ovlaštenog lica, da je privredno društvo izvoznik, odnosno da je ostvarilo više od 30% izvoznog prihoda u poslovnim prihodima prethodne finansijske godine (u izjavi navesti ukupan prihod za 2019. godinu i prihod od izvoza za 2019. godinu, sa izračunatim postotkom izvoza u odnosu na ukupan prihod u 2019. godini),
10. Izjavu, ovjerenu pečatom firme i potpisom ovlaštenog lica, da nije korisnik dodijeljenih budžetskih sredstava iz prethodnog perioda za koja je upućen nalog za povrat ili ukoliko jeste da je do dana podnošenja zahtjeva za dodjelu finansijske pomoći realizovao isti,

11. Izjavu, ovjerenu pečatom firme i potpisom ovlaštenog lica, da nakon 01.08.2020. godine nije isplaćena dividenda kroz dobit iz prethodnih godina, osim ako je dividenda isplaćena u obliku dionica korisnika pomoći,
12. Izvještaj Centralne banke Bosne i Hercegovine kojim se dokazuje da glavni račun na koji se treba uplatiti finansijska pomoć, nije blokirana,
13. Lična karta i CIPS potvrda o prebivalištu lica ovlaštenog za zastupanje,
14. Spisak zaposlenika iz matične evidencije aktivnih osiguranika na dan 30. 09. 2020. godine, izdat od strane nadležne službe.

## **VIII. ZAKLJUČIVANJE UGOVORA**

Ministarstvo sa korisnikom finansijske pomoći zaključuje Ugovor o dodjeli finansijske pomoći kojim se uređuju međusobna prava i obaveze.

Ugovor obavezno sadrži i sljedeće elemente:

- a) ukupan iznos i namjenu sredstava koja se dodjeljuju,
- b) dinamiku i načine doznačavanja sredstava,
- c) obavezu korisnika pomoći da će po zahtjevu Ministarstva u roku od 15 dana od dana prijema zahtjeva izvršiti povrat nezakonito odnosno nenamjenski utrošenih sredstava ili cjelokupan iznos dodijeljene finansijske pomoći u slučaju propuštanja korisnika finansijske pomoći da ispuni obaveze iz ugovora,
- d) obavezu korisnika pomoći o izdavanju vlastite mjenice „bez protesta“ u svrhu osiguranja povrata neutrošenih ili nezakonito utrošenih sredstava odnosno nenamjenski utrošenih sredstava ili povrata cjelokupnog iznosa dodijeljene finansijske pomoći u slučaju propuštanja korisnika finansijske pomoći da ispuni obaveze iz ugovora.

Korisnik finansijske pomoći Ministarstvu podnosi izvještaj o utrošku dodijeljenih sredstava finansijske pomoći u skladu sa odredbama ugovora, najkasnije do 28.02.2021. godine.

Neutrošena sredstva i/ili nezakonito odnosno nenamjenski utrošena sredstva korisnik finansijske pomoći je u obavezi vratiti u Budžet Federacije BiH u roku od 15 dana od dana upućivanja zahtjeva za povrat sredstava od strane Ministarstva odnosno nadležnog organa.

## **IX. PRIPREMA**

Zahtjev za dodjelu finansijske pomoći, sa potrebnom dokumentacijom, navedenom u tački VII. (PROVOĐENJE JAVNOG POZIVA) ovog Javnog poziva, uvezan i poredan po tačkama od 1. – 14., dostavlja se Ministarstvu, preporučeno poštom ili lično u zapečaćenoj, neprovidnoj kovrti na adresu: Federalno ministarstvo energije, rudarstva i industrije Mostar, Alekse Šantića b.b. 88 000 Mostar s naznakom: Ne otvarati – po Javnom pozivu za podnošenje prijava za dodjelu finansijske pomoći izvoznim privrednim društvima u sektoru industrije (obavezno navesti i granu industrije kojoj pripada). Na poleđini kovrte obavezno navesti naziv podnosioca zahtjeva, adresu i kontakt telefon.

Povrat dokumentacije, formalno neispravnih zahtjeva, se vrši isključivo na pismeni zahtjev podnosioca.

Odluka o dodjeli finansijske pomoći se objavljuje u „Službenim novinama Federacije BiH“ i na službenoj web stranici Ministarstva.